



30. april 2024

UPA2024/98

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Inatsisartut isummerfigisassaattut siunnersuut, Naalakkersuisut peqquneqassasut naartunermi, erninermi meeravissiartaarnermilu sulinggiffeqartarneq pillugu Inatsisartut inatsisaata nr. 5 19. november 2020-imeersut allanngortinneqarnissaanik imaasillugu, angajoqqaatut sulinggiffeqarneq sapaatit akunnerinit 21-nit sapaatit akunnerinut 37-inut sivitsorneqassasoq aammalu angajoqqaat kiffaangissuseqarlutik namminneq sulinggiffeqarnermik aaliangiisinnaassasut.**

(Inatsisartunut ilaasortaq Anna Wangenheim, Demokraatit)

Siumuminngaanniit siunnersuuteqartumut inatsisartuni ilaasortaq Anna Wangenheimut, Demokraatit, qujavugut.

Siumuminngaanniit pingaartitarivarput ilaqtariit peqqissut pitsaasumik inerisartornissaminnut tungavissaqartuarnissaat. Angajoqqaanngorlaat kisimiittuugaluarunik angajoqqaarsiaagaluarunilluunniit toqqissimasumik qitornaminnut qitornarsiaminnullu inunngorneraninngaanniit periarfissaqartumik perorsaanissaannik periarfissinneqarnissaat.

Taamaammat Siumuminngaanniit pingaartipparput meeqqamut perorsaanikkut ullutsinni atorfissaqartinneqartut angajoqqaatut akisussaaffigisat nunatsinni nunanilu allani inerisarneqartut peqataaffiginissaat.

Nunarpummi ukiorpassuanngortuni sulisoqarnikkut amigaateqartarnera Siumuminngaanniit ilisimaarilluinnarparput. Nunani allani ilinniartoqartarnitsigut uagullu nammineq nunatsinninngaanniit akileeqataasarnitsigut amerlaqisullu aamma ilinniarfigisartakkaminni uniinnartarnerat malunnaatilimmik iliuuseqarfigisariaqarparput, nunatsinninngaanneersullu ilinniartuutigisartakkagut sulisussallu atorfissaqartitagut allat qitorniornissaannik nunani allani periarfissat pitsaanerusut unammillissagutsigu pitsaanermik iliuuseqarnissarput massakkut inatsisitigut iluarsiissuteqarnissatsinnut Siumuminngaanniit siunnersuuteqartoq inatsisartuni ilaasortaq Anna Wangenheim, Demokraatineersup siunnersuutaa taperserparput.



Siumuminngaanniimmi pingaartilluinnarparput meeraq angajoqqaaminni inunngorneraniit kissalaarnermik tunineqarlutik aallaaveqartuarnissaat, meeqqammi ineriartornerminni misigisimasartik angajoqqaami tunniussaata aallaavigalugu innuttaasuni nunaqqataasuni malugineqartartoq Siumuminngaanniit ilisimaarivarput. Taamatut meeraq aqquasaagaqarsimagaangami siunissami aamma ineriartornissaminut atuarluni ilinniaqqinnissaminullu alloriaqqinnissamut tullermut sakkusaqarluarluni ingerlaqqissinnaasartoq atuarfeqarfanni ilisimaneqartoq Siumumit ilisimaarivarput. Siumuminngaanniit isumaqarpugut nunatsinni sulisut, allaniillu nunani suliarorusuttut qitornartaarnissamut periarfissartik takusinnaagunikku nunatsinniiginnarnissamut aqquataalluarsinnaajumaartoq una siunnersuutigineqartoq Inatsisartuni Naalakkersuisunillu suliaralugu naammassineqarpat.

Taamatut Siumuminngaanniit naatsumik oqaaseqarluta siunnersuut isumaqataaffigalugu aappasaaniinginnerani ilaqtariinnermut peqqissutsimullu ataatsimiititaliamut ingerlateqqipparput ataatsimiititaliamilu sulilluortoqarnissaanit kissaassilluta.

Mala Høy Kúko  
Siumut